

樂邦文類
卷四

風陵文庫

文庫19

F221

4

樂邦文類卷第四

四明石芝沙門

宗曉

編次

雜文三十三首

維摩疏示四種佛國

天台智者大師

觀經疏明四土宗致

同前

萬善同歸集揀示西方

智覺禪師

延壽

彌陀通贊示西方要義

慈恩法師

窺基

寂照集揀示西方要義

出直指淨土決疑集

西資鈔揀示偏讚西方

孤山法師

智圓

請四明法師住世書

文公楊

億

復文楊公請住世書

四明法師

智禮

答楊文公問

同前

延慶募衆念佛疏

同前

往生淨土決疑門

慈雲懺主

遵式

義學編論席解紛

淨覺法師

仁岳

淨土修因或對

檀菴法師

有嚴

淨土魔佛或對

同前

唯心淨土說

圓辯法師

道琛

唯心淨土文

姑蘇禪師

守訥

勸修西方說

解空法師

可觀

淨土略因

待制晁

說之

淨土餘說

草庵法師

道因

淨土自信錄記

無功叟王

闡

淨業專雜二修

京師比丘

善導

辨橫豎二出

相江法師

擇映

晨朝十念法

天竺懺主

遵式

念佛方法

同前

校量念佛功德

同前

往生坐禪觀法

同前

念佛修心術

山堂法師

彥倫

寶王論揀示往生義

草堂禪師

飛錫

念佛方便文

司諫江

公望

無常院安彌陀佛像

出無盡燈

臨終正念訣

京師比丘

善導

命終請僧念佛感應

出寶珠集

維摩經疏示四種佛國

天台智者大師說

佛國差別之相無量無邊今略為四一染淨國凡聖共居二有餘國方便人住三果報國純法身居四常寂光妙覺所居前二是應即應佛所居第三亦應亦報即報佛所居後一但是真淨非應非報法身所居

一染淨國又二。初同居穢者凡聖同居國也凡聖各二凡居二者一惡眾生即四趣也二善眾生即人天也聖居二者一實聖即四果支佛通教六地別十住圓教信後心通惑雖斷報身猶在二權聖謂方便實報寂光土中法身菩薩及妙覺佛為利有緣應生同居皆是權也是等與凡共住故云凡聖

同居四趣共住故云穢土次同居淨土者無量壽國雖果報殊勝難可比喻然亦染淨凡聖同居何者雖無四趣而有人天以生彼土者未必悉是得道之人故經云犯重罪者臨終之時懺悔念佛業障便轉即得往生若但生聖凡夫何得願生故知雖具惑染亦得居也聖生權實類前可知但以無四惡趣故名爲淨問穢土十惡所感四趣依正皆穢可然但十善果淨土因同何得依正頓別耶答二處修因善名雖同淨土修善精微勝故故彼凡聖所得依正不同穢土二明有餘土者二乘三種菩薩證方便道之所居也何者若修二觀斷通惑盡恒沙別惑無明未斷捨分段身而生界外

受法性身即有變易所居之土名有餘土亦名方便方便行人之所居故攝大東明七種生死此即第四方便生死三明果報土者即華藏純諸法身菩薩所居破無明顯法性得真實果報而無明未盡潤無漏業受法性報身名果報國也以觀實相發真無漏所得果報故名爲實修因無定色心無礙亦名實報無障礙土華嚴明因陀羅網世界是也四常寂光土者妙覺極智所照如如法界之理名之爲國亦名法性土但真如佛性非身非土而說身土離身無土離土無身名其土者一法二義普賢觀毗盧遮那住處名常寂光問華嚴明十種佛土此四攝盡否答何但攝十乃至有人言

經明二十七品佛土無量壽土止是第六現文對四攝無不盡問何不依十及二十七答一往有文欲對四教措意難見

觀經疏明四土宗致

此經以心觀淨則佛土淨為宗致四種淨土謂凡聖同居土方便有餘土實報無障礙土常寂光土也各有淨穢五濁輕重同居淨穢體析巧拙有餘淨穢次第頓入實報淨穢分證究竟寂光淨穢娑婆雜惡荆棘瓦礫不淨充滿同居穢也安養清淨池流八德樹列七珍次於泥洹皆正定聚凡聖同居上品淨土也方便有餘者修方便道斷四住惑故曰方便無明未盡故言有餘釋論云出三界外有淨土聲聞辟支佛出

生其中受法性身非分段生就中復有利鈍攝上為淨攝下為穢也實報無障礙者行真實法感得勝報色心不相妨故言無障礙純菩薩居無有二乘仁王經云三賢十聖住果報即是其義華嚴無量香雲臺即其土淨妙五塵就中更論次第頓悟上下淨穢等也常寂光者常即法身寂即鮮脫光即般若若是三點不縱橫並別名秘密藏諸佛如來所游居處真常究竟極為淨土分得究竟上淨穢耳故以修心妙觀能感淨土為經宗也

四明妙宗釋曰太乘之法其要在心心具易知色具難解故觀自觀他皆修心觀今觀淨土須求於心心能具故心

能造故心垢土垢心淨土淨此猶通示未是的論的在下
心頓修三觀此觀觀於安養依止畢竟清淨名心觀淨此
觀能令四佛土淨如是方為此經宗致初五濁輕爲同居
淨者此淨甚通須知別意如我善者四教凡位皆悉能令
五濁輕薄感同居淨而圓觀輕濁感同居淨依止最淨如
此經說地觀已去一一相狀比於餘經修衆善行感安養
土其相天殊委解四土如此經本爲韋提希厭同居穢求
同居淨故談妙觀觀彼依止三觀若成鹿垢先落非有餘
淨更生何處須知正爲生同居淨故說三觀良由觀妙能
破三惑不獨感於同居淨土隨其感斷淺深之處自然感

得有餘等三如病須藥本爲身安求得仙方修合服之不
但身安兼能輕骨身安可喻生同居淨輕骨可喻感上三
土只是藥効乃深勝如一妙觀能淨四土

萬善同歸集揀示西方

智覺禪師

延壽

問唯心淨土周徧十方何得托質蓮臺寄形安養而興取舍
之念豈達無生之門忻厭情生何成平等答唯心佛土者了
心方生如來不思議境界經云三世一切諸佛皆無所有唯
依自心菩薩若能了知諸佛及一切法皆唯心量得隨順忍
或入初地捨身速生極樂佛土故知識心方生唯心淨土著
境祇墮所緣境中既明因果無差乃知心外無法又平等之

門無生之旨雖即仰教生信其奈力量未充觀淺心浮境強
習重須生佛國以仗勝緣忍力易成速行菩薩道起信論云
衆生初學是法欲求正信其心怯弱以往婆娑不常值佛信
心難成意欲退者當知如來有勝方便攝護信人謂以專意
念佛因緣隨願得生佛土常見於佛永離惡道若人專念西
方阿彌陀佛即得往生常見佛故終無有退往生論云游
地獄門者生彼國土得無生忍已還入生死國教化地獄救
苦衆生以此因緣求生淨土十疑論云智者熾然求生淨土
達生體不可得即是真無生此謂心淨故即佛土淨愚者爲
生所縛聞生即作生解聞無生即作無生解不知生即無生

無生即生不達此理橫相是非此是謗法邪見人也

問一生習惡積累因深如何臨終十念頓遣答那先經云國
王問那先沙門言人在世間作惡至百歲臨終時念佛死後
得生佛國我不信是語那先言如持百枚大石置船上因船
故不没人雖有本惡一時念佛不入泥犂中其小石沒者如
人作惡不知念佛便入泥犂中又智論問云臨死時少許時
心云何能勝終身行力答是心雖時頃少而心力猛利如火
如毒雖少能作大事是垂死時心決定勇健故勝百歲行力
是後心名爲大心及諸根事急故如人入陣不惜身命名爲
健故知善惡無定因緣體空跡有升沉事分優劣真金一兩

勝百兩之疊華燭火微光藝萬仞之積草

問心外無法佛不去來何有見佛及來迎之事答唯心念佛以唯心觀徧該萬法既了境唯心了心即佛故隨所念無非佛矣般舟經云如人夢見七寶親屬歡喜覺已追念不知在何處如是念佛此喻唯心所作即有而空故無來去又如幻非實則心佛兩亡而不無幻相則不壞心佛空有無礙即無去來不妨普見見即無見常契中道是以佛實不來心亦不去感應道交唯心自見如造罪衆生感地獄相唯識論云一切如地獄同見獄卒等能爲逼害事故皆是罪人惡業心現並無心外實銅狗鐵蛇等事世間一切事法亦復如是然備

遮那佛土匪局東西若正解了然習累俱殄理量雙親

問龐居士云事上說佛國此去十萬里大海渺無邊動即黑風起往者雖千萬達者無一二忽遇本來人不在因緣裏如何通會而證往生答若提宗考本尚不說有佛有土豈言達之不達乎所以天真自具不涉因緣匪動然毫常真具體若約事論故非一等九品往生上下俱達或游化國見佛應身或生報土覩佛真體或一夕而便登上地或經劫而方證小乘或利根鈍根或定意散意或悟遲速根機不同或華開早晚時限有異今古具載凡聖俱生行相昭然明證目驗佛梵音聲終不誑人稱讚淨土經云十方恒河沙諸佛出廣長古

相徧覆大千證得往生豈虛言哉

問維摩經云成就八法於此世界行無瘡疣生于淨土何等
為八饒益衆生而不望報代一切衆生受諸苦惱所作功德
盡以施之等心衆生謙下無礙於諸菩薩視之如佛所未聞
經聞之不疑不與聲聞而相違背不嫉彼供不高已利而於
其中調伏其心常省已過不說彼短恒以一心求諸功德如
何劣行微善而得往生答理須具足此屬大根八法無瑕成
就上品如其中下但具一法決志無移亦得下品
問觀經明十六觀門皆是攝心修定觀佛相好諦了圓明方
階淨域如何散心而能化往答九品經文自有升降上下該

攝不出三心一定心如修定習觀上品往生二專心但念名
號衆善資熏迴向發願得成末品仍須一生歸命盡報精修
坐卧之間常面西向當行道禮敬之際念佛發願之時懇苦
翹誠無諸異念如就刑戮若在狴牢怨賊所追水火所逼一
心求救願脫苦輪速證無生廣度含識紹隆三寶誓報四恩
如斯志誠必不虛棄如或言行不稱信力輕微無念念相續
之心有數數間斷之意恃此懈怠臨終望生但為業障所遮
恐難值其善友風火逼迫正念不成何以故如今是因臨終
是果應須因實果則不虛聲利則響順形直則影端故也如
要臨終十念成就但預辨津梁合集功德迴向此時念念不

瞿即無慮矣夫善惡二輪苦樂二報皆三業所造四緣所生
六因所生五果所攝若一念心瞋恚邪婬即地獄業慳貪不
實即餓鬼業愚癡闇蔽即畜生業我慢貢高即脩羅業堅持
五戒即人業精修十善即天業證悟人空即聲聞業知緣性
離即緣覺業六度齊修即菩薩業真慈平等即佛業若心淨
即香臺寶樹淨刹化生心垢則丘陵坑坎穢土稟質皆是等
倫之果能感增上之緣是以離自心源更無別體維摩經云
欲得淨土但淨其心隨其心淨即佛土淨又經云心垢故衆
生垢心淨故衆生淨華嚴經云譬如心王寶隨心見衆生衆
生心淨故得見清淨刹大集經云欲淨汝界但淨汝心故知
一切歸心萬法由我欲得淨果但行淨因如水性趣下火性
騰上勢數如是何足疑焉

彌陀通贊示西方要義

慈恩法師

窺基

問十方佛國快樂皆同何故徧指西方勸人生彼答良爲凡
夫業重處處生貪若不徧指一方即不繫心專注所以法華
經云衆生處處著引之令得出又西方淨土主勝願強徧勸
往生疾成聖果所以徧指也

問慈氏天宮快樂不少勝侶頗多何須堅勸往生西方答若
論堯率即勝不聞乃並西方全成微劣勸生西方捨劣求勝
也勝劣者淨土十勝天宮十劣淨土十勝者一化主所居勝

二所化命長勝三國非界繫勝四淨方無欲勝五女人不居
勝六修行不退勝七淨方非穢勝八國土莊嚴勝九念佛攝
情勝十十念往生勝天宮十方者一所居國土方二所化壽
促劣三界繫攝屬劣四彼天有欲劣五男女雜居劣六修行
有退劣七穢方非淨劣八國土莊嚴劣九善念攝情劣十修
行勞苦劣有斯十勝十方所以勸生樂國

問其國衆生無有衆苦但受諸樂如何無衆苦耶答其國衆
生連華化生無生苦四序不能遷無死苦非分段身無病苦
壽命無盡無死苦無父母親疎無冤憎會苦所欲如意無求
不得苦顛貌端嚴無諸根缺陋苦四時一等無寒暑苦安樂

世界有漏形軀四蛇迫身三龍害命乖張病惱報盡死侵有
憂必滿無怨不會蓋迷至理橫受陰纏今惑衆人永無此等
故云無有衆苦豈唯近亡鹿苦兼亦妙果非遙

問臨終作善便得往生何假預前修諸勝業答人生壽夭難
測或即病困昏迷或即非時奄逝既關生前之善難逃後世
之殃預作善緣恐防斯咎

問十念彌陀頓生淨土據斯所說果著因微何故彌陀經攝
不可以少善根福德因緣得生彼國答十念得生接引懈心
衆生却談多善因緣乃被精勤之者或廣或略理不相違
問往生之人有中有身否答羣疑論中有二說一云極善

惡無中有身二云不揀善惡但有捨報受生皆有中有為傳
識故唯除現世變身即無中有今取有者為正

寂照集揀西方要義

此文不知何師作
文見直指決疑集

問慈恩製彌勒上生經疏深讚現率內院乃曰天宮有十勝
生淨土有七難生聖師所說必不悞久未審如何融會答爾
只知慈恩上生疏勸生天宮而不見彌陀通贊說淨土十勝
聖師製作豈有相違蓋演教隨機各示方便此與如來所說
彌陀經無量壽經等勸生西方又說彌勒上生經勸生內院
意趣一同衆生機緣各異佛土攝受亦然譬如有人生緣在
南具舟欲往吳越治裝問程知者應酬所問豈可却讚陸行

之便和秦蜀之盛哉如此則我增惑亂不成利益通方又何
隨願知歸淺見狐疑強生胡越

問天宮壽長足得修行人中積善亦自超越至於脩羅龍鬼
三塗惡趣正好拔苦利生何必專務極樂答欲夫耽著妙樂
醉於欲酒福盡即墮如箭射空色夫雖獨行無文而未盡形
累無色不出輪迴經中判為難地傳大士所謂饒經八萬劫
終是落空云又有一類神仙別得生理壽千萬歲楞嚴謂之
精研七趣皆是昏沉諸有為相妄想受生經無量劫不得真
淨脩羅毒瞋龍趣怖惱鬼道沉冥長夜三塗苦惱難名遠思
天上五衰近觀人間四相誰有智者樂入苦海若求速免輪

迴無過求生淨土生淨土者自然身光照耀具六神通信眾
聖於剎那越三界而常樂故佛言無量壽國快樂無極長與
道德合明未拔生死根本是也

問見性悟道便超生死何用念佛求生耶答通昧他心聖凡
安測除非徧知投託應難真修行入自當審察諸作者汝觀
自己見性悟道得入師位能如馬鳴龍樹否得大三昧能如
南嶽智者否宗說俱通能如忠國師壽禪師否此等諸師皆
明垂言教深切勸往他豈悞人乎況佛金口讚嘆叮嚀普賢
恭稟佛誨定不謬也又當自度命終得去住自在否無始惡
業不現前否捨此報身定脫輪迴否三塗險道中出沒隨行

否天上人間十方世界託生無礙否若也了了自信得及何
幸如之其或未然竊勿貢高不修淨土

問六祖壇經云凡愚不了自性不識身中西方東方願西悟
人在處一種誌公云智者知心是佛愚人愛往西方若此道
果是真正何故二大士排遣答佛說法有隱顯教有權實人
根有利鈍宗師有抑揚譬如受病不同處方亦異亦有病腦
發黃方大狂亂有善醫者必以寒藥治之豈可却讚乳石桂
附有除寒起廢之功耶有徧見人間寒藥有治熱之功遂云
乳石桂附永不可用豈不謬哉達磨單傳心印誌公方贊木
乘當時人尚未信豈可又却教人念佛求生淨土圓機達士

固自無疑求法初心定生猶豫但得意忘言融通了解自無
矛盾也

西資鈔棟宗偏讚西方

孤山法師

智圓

夫求生淨土是假他力彌陀願攝釋迦勸讚諸佛護念三者
備矣苟有信心往生甚易如度大海既得巨航仍有良導加
以便風必能速到彼岸也若其不肯登舟遲留惡國者誰之
過歟夫十方皆有淨土釋迦於諸經中亦乃偏讚而未代行
人偏好求生於極樂國願升於知足夫者豈非彌陀與釋迦
化道相關彌勒仍是釋迦補處所以眾生願樂者多矣微感
者衆矣近代淺識不能加其功行唯徒互相排毀好淨土者

或輕於知足尊內院者則毀彼西方豈知級引二門同歸一
道寄語後學宜自思之或問智者慈恩皆聖師也而各偏讚
一方何故予之不許耶對曰聖師偏讚意引偏好令心決定
乎致受益者衆焉但世變人澆致偏讚成弊故吾復得和
之或當有息諍受益而各自隨所好求生者其或後世以和
融混一為弊者亦異命世之賢復偏讚而救之應病與藥貴
有益於眾生耳亦何常之有然則吾自童年便誦此經雖偏
想十方而終期心於淨土乃知於彌陀其有緣乎世人或謂
法界混同誰分彼此唯心一貫何用去來今謂世人有如是
解者所棲必求好泉所親必擇名師所服猶悅名衣所食或

便美食苟四者未妨於法界混同唯心一貫者則何妨於樂
二之淨眾親彌陀之名師服上妙之天衣食純陀之美膳豈
不愈於此土乎世又有聞過十萬億佛土而望途怯遠談生
者多是捕風而影躬弗逮豈知十方空界悉我自心心淨則
十萬非遙心垢則目睫猶遠但期心淨何等程途豈不思少
頃睡眠夢行千里豈以常時為比較耶又豈不聞首楞嚴云
「方虛空生汝心中猶如片雲點太清裏況諸世界在虛空
耶今若畏程遙是畏自心非畏程也又若謂我是下凡彼多
補處者且目心即佛因果理同尚有於此穢惡之邦以短促
之命而一生超登十地者於彼清淨土中壽復無量既獲勝

時長何患不至補處乎幸異智者靜而思之無負佛恩無負
自己勉之勉之

請四明法師住世書

文公揚

億

億啓近者竊審大師期結社於十僧約入懺之三載然赴太
光之正受決取淨土而往生身見頓空願力彌壯登蓮華之
絕品開法樹之至音茲事匪虛先佛所證然於俗念切時願
心誠以太師洞三觀之指歸為四眾之欽仰續台嚴之慧命
啓越絕之度門十善誘入竟存於白業一音扶教廣演於金
言慈蔭普均道風允穆惟極樂之界蓋覺皇之示權而太惠
之軀非智人之所樂僅存忻厭即起愛憎既萌取捨之心乃

生能所之見諒惟通悟夙究真常蓋俯就於初機冀策發於
淨行伏望因承恩詔彌廣福田增延住壽之期恢闡化緣之
盛仍冀懺期之告畢略遵法步以相從庶効純陀恭養末後
之供願同慶喜頓釋離塵之心幸軫瞽蒙未遑寂滅切希垂
聽顯俟報音謹奉咨聞

復揚文公請住世書

四明法師

知禮

智禮謹於講懺之際依本宗教觀寫書奉答秘監大檀越禮
伏奉載垂真翰曲賜重言俾知禮畢此懺期更留講訓仰承
尊旨合改先心但以專誠久趣此門鄙志莫能易轉況良時
難遇勝事易差故欲且副夙心不果恭遵嚴命其如傳法之

務利人之功諒此身所為其益蓋寡俟淨土却至其化方隆
所言知禮洞三觀之指歸者稱之太過也又云極樂本由示
權修道須忘所厭者誠哉是言也而知禮今所淨土持厭患
身亦有其由輒伸於後若其一心三觀雖非洞達敢不依凭
知禮僅四十餘年尋其筌筌學其去就神根既鈍證入無由
而於戶牖閑房行用時節多所游歷亦略諳知今者蒙索報
音故難杜口粗陳梗槩希賜否臧三觀者一念即空即假即
中也恢揚肇自於如來妙悟近推於智者全由性發實匪修
成故於一心宛有三用所謂空者一切皆空即三觀悉彰破
相之用也假者一切皆假即三觀悉明立法之功也中者一

切皆中即三觀悉是絕待之體也是則終日破相而諸法皆
成終日三法而纖塵必盡終日絕得而二諦熾然故般若談
空八十法門得顯維摩之法三界見愛皆忘法華一乘世間
之相常住皆由三觀相即致令諸法無遺故三即非三一即
非一非次第而入非並列而觀不可以有無求不可以中邊
取故云不並不別非縱非橫蓋三一圓融修性冥泯豈識心
之所測何言說之能詮故強示云不可思議之妙觀也說即非
說無說而說能知此已對一切境以此觀照了之立一切行
以此觀導達之辦一切事以此觀成就之設一切教以此觀
敷暢之修此觀者能所必忘取捨斯泯故真如無念向則心

絕終日說示不異無言捨此則必同衆魔離此則未超諸外
故龍樹云除諸法實相餘皆魔事迦葉云未聞大涅槃前皆
是邪見大笑哉一心三觀之妙宗也故知禮所求安養而生
所欲燃燼而死憑此三觀遣彼百非也言極樂之界蓋覺皇
示權者經論既以淨土之教為勝方便驗知是如來善巧權
用也但權名不局實理亦通是要甄分方知去取體外之權
須破體內方便須修離事之理則鹿即權之實方妙故小乘
無他佛之說大教有利海之談蓋心性徧周法界無外理極
故令事廣華大故有池深利如帝珠出現重重無盡方顯寂
光之理身類天饌感報彼彼不同乃表遮那之性豈應極樂

不預唯心故如來藏中涅槃具足隨緣發現應量而知既能彰地獄天堂豈不造穢邦淨國本性剎具由心發明彌陀以無緣之慈取極樂之土釋迦以樂說之辯示往生之門斯皆善巧之權方便攝彼沉淪之品彙今懼退轉者不退使不善觀者能觀淨土權相蓋多今且略論此二故起信論云初學大乘正信以在此土不常值佛懼謂信心缺緣退失當知如來有勝方便令其不退但當專念極樂世界阿彌陀佛真如法身必生彼國住正定故專念真如法身者豈異大乘正信以依彼佛為境故能牽生淨方斯是如來權巧也又觀無量壽佛經云凡夫心想羸劣未得天眼不能遠觀諸佛如來有異

方便令其得見此蓋釋迦神力彌陀願心若有諦觀必能得見斯亦覺皇異妙方便也此之權巧方便既約圓論即與法華微妙方便無二無別故諸天及人聲聞緣覺事度菩薩漸修木士充滿世間數等河沙盡思度量不能知覺唯佛與佛乃能究盡圓信圓解方能造修知禮雖是鈍根濫沾圓教不離當念願達彼方庶即下凡便階不退復聞大通佛世結緣之徒已經塵點劫來尚住聲聞之地皆由退大故涉長時身子六心退落五道況悠悠學佛者乎蓋由此土多值退緣故云魚子菴羅華菩薩初發心三事因中多及其結果少若求生安養即於博地能藉勝緣纔獲往生永無退轉聞茲利益

得不忻求乃用一心三觀為舟航復以六時五悔為櫓棹求
往唯心之淨土願見本性之彌陀然後運同體之大悲度法
界之含識順佛權巧求生樂邦其意略爾所言儻存忻厭即
起愛憎既萌取舍之心乃生能所之見者起過之相誠如所
言立德之緣今當略說蓋以忻厭取舍善能起過成功故為
鳴立為始覺之基智者稱為淨土之漸維摩以見愛為待者
文殊以貪恚為功能斯皆用之在人衆之有法且衆生曠劫
住此娑婆貪於麁弊色聲著於下劣依正既無厭離之念但
增繫縛之緣縱有熏修鮮有克遂以此土法多障致道行難
成故涅槃經云得不身者如爪上土失人身者如大地土是

故諸佛愍此衆生以願行功取清淨土今起忻慕作受生因
以苦切言說垢穢相令其厭惡成出離心若非此心不成始
行故非厭離捨此經由不起忻求生彼無貪盡受生之法以
愛為緣始自初心終至等覺變易未盡忻厭區忘況始行耶
今求淨土不為身受諸樂心染妙塵蓋欲托彼淨緣速增勝
道以彼壽命無盡依報自然無有女人及以根缺雖聖凡共
處而無惡道之名雖聲聞無邊且離執真之見彌陀為良導
觀音為勝友一生補處甚多十地聖人無數風吟寶樂波動
金渠皆出妙音盡詮至理既無違順永息貪嗔凡有見聞悉
資寂照皆住正定功在於斯令之衆園尚須求預彼之寶刹

寧不願生但知淨土唯心穢邦即性即厭無厭即忻無忻是
則正助合修解行兼運順佛正教非已曲情況觀經說上品
生因須大乘妙解加修亦度兼勸眾生故知禮今以三觀攻
心五悔助道仍恐淨因未備故以畢命自要庶憑最後之強
緣以作往生之定業而又若不燒身臂指非出家菩薩梵網
之誡明然捨身命財是真法供養法華之文煥矣楞嚴然香
一炷宿債俱酬輪王剎身千燈妙果斯克故知初心後位上
聖下凡皆可遵修並彰至教但存正解自免邪修以知性火
真空豈有能燒之相所燒自忘也又知佛體圓妙豈有所供
之人則能供亦寂矣兩重能所既泯一切功德斯成是名定

行法門所謂火光正受四土淨境頓現此心諸佛道場
此處但隨所願必遂往生故智者云臨終在定之心即是淨
土動念即是往生淨土時如此捨穢身則盡垢穢之際何理
不彰如此取淨土則極清淨之源何惑不遣是以韋提忻清
淨業報之處即證無生薩埵捨癰疽瘰癧疾之身云求常樂此
之取捨與不取捨體無二種用亦同時得名三種法門謂取
法門捨法門不取不捨法門亦是三毒法門具一切法故無
行經云貪欲即是道患癡亦復然如是三法中具一切功德
文殊云我是貪欲尸利我是瞋毒尸利我是愚癡尸利深得
此意即一心三觀導一切行辦一切事也以一切法空故捨

我必盡一切法假故取淨無遺一切法中故無取無捨此之三法一切如來同證一切菩薩共修故知禮今捨穢身所求淨土輒取仰効也然則修心萬行入道多門隨樂隨宜隨修隨悟敢將徇管局彼太虛但以知禮爰自少年便存此志今已衰朽多歷事緣此心常自現前對境彌加增進信由宿願敢不恭酬年來建立道場衆信共營供具三載資緣粗備數僧行願偶同此者遭逢秘監知平姓名察其始末敢請俯爲檀越運以力輪使片善之有成俾淨願之克遂然後庇我宗敎廣見流行今未聞者聞使未悟者悟更冀佐治功成之後期願報滿之時隨願求生極樂世界冀得同會一處同歡

因同化舍生同登大覺知禮素無文學元是野僧後語廣淨顯理踈脫蓋奉讀前書云精修懺之規臻乎本淨次書云淨二匪虛先佛所證仰惟秘監深洞苦行可以窮源復知淨邦由來即理蓋欲知禮廣援誠教傍示未聞是敢輒附本宗少述愚見有黷台聽不任悚惶不宣

荅楊文公問

同前

承師有言西方淨土風吟寶葉波動金渠此是何人境界答曰即此見聞更無道理既彰教義寧免指陳夫淨土依正俱宜妙法聞者合了根塵絕跡物我一如豈執有人對他境界此間圓頓行者以根對塵起識之時即了以法界對法界

起法界實非心外之境境外之心則心自知心境自見境境
豈見境心豈知心知見既忘言詮亦絕故強名云不思議境
觀也凡位修之尚爾聖位證之奚言又若強論所離之境差
別之相者塵中之塵凡夫境界細中之細是佛境界斯蓋啟道
分別也若全圖論不離而離初心能離佛之所離以一心三
觀即佛智故前書云對一切境以此觀照了之斯之謂矣

延慶募衆念佛疏

同前

原夫一念本融諸法無礙遇惠既異感報成差是以順性而
修則願諸佛淨土隨情而作則循五趣苦輪所以處波濤者
升出尤難墮落者衆故經云得入身者如爪上土失人身者

如大地土直待三乘行備方免四趣受生蓋境界塵強煩惱
熾盛自力求脫實難其人若失生安養者國土莊嚴身心清
淨直至成佛不墮三途經云尚無惡道之名何況有實又云
衆生生者皆是阿鞞跋致若欲生彼但當稱彼佛號修彼佛
慈必為彼佛本願攝取捨此報身定生彼國具如經說實非
臆談今結萬人以為一社心心繫念日日要期每歲仲春同
集一處同修供養同聽法音會彼萬心以為一志俾成定業
誓取往生況報得命光其猶風燭一息不至三途現前何得
自寬不思來報當依佛語無順人情頓息繫緣唯勤念佛

往生淨土決疑門

慈雲懺主

遵式

決疑者疑為信障世間小善尚不能成況菩提大道乎古今諸師歸心淨域者或製疏解經或宗經造論或隨情釋難或伽陀讚揚雖殊途同歸而各陳所見動盈編帙尋究良難今統彼百家以三疑收盡一疑師二疑法三疑自一疑師者師有二種一邪外等師則惑化人非所承也二正法之師復有凡聖因果凡及因位各有未了猶清辯謂今彌勒未是徧知俟龍華道後方復開津即其事也今顯示西方今迴向者唯果佛聖師釋迦如來及十方諸佛出廣長舌說誠實言讚勸往生更何所惑

二疑法者佛法有二一者小乘不了義法二者大乘了義法

大乘中復有了不了義今談淨土唯是大乘了義中了義之法也且小乘經部拈盡見書曾無一字讚勸往生他方淨土故天親論云女人及根缺二乘種不生此即明據也問小彌陀經等皆說彼國有聲聞弟子及鼓音王經云佛母名殊勝妙顏亦應復有女人答佛母且相初降生時成正覺已國土隨淨必無女人其母或轉成男子如此方龍女或復命終如悉達母有人注論引此經文而云彼土亦有女人者非也聲聞如觀經疏及十疑論和會今明大乘復有三種一者二乘通教此則門雖通大類神二乘又當教菩薩雖復化他淨佛國土化畢還同二乘歸於永滅淨土深理非彼所知非了義

也二者大乘別教此明大乘獨菩薩法雖談實理道後方證
因果不融淨土則理外修成萬法乃不由心具雖塵劫修道
廣游佛刹指彼淨土因果但是體外方便斯亦未了三者佛
乘圓教此教詮旨圓融因果頓足佛法之妙過此以往不知
所裁也經曰十方諦求更無餘乘唯一佛乘斯之謂與是則
大乘中大乘了義中了義十方淨穢卷懷同在於剎那一念
色心羅列徧收於法界並天真本具非緣起新成一念既然
一塵亦爾故能一一塵中一切剎一一心中一切心一一心
塵復互周重重無盡無障礙一時頓現非隱顯一切圓成無
勝劣若神珠之頓含眾寶猶帝網之交映千光我心既然生

佛體等如此則方及迴神億刹實生乎自己心中孕質九蓮
豈逃乎剎那際內苟或事理攸隔淨穢相妨安令五逆凡夫
十念便登於寶土二乘賢輩迴心即達於金池也哉信此圓
談則事無不達昧斯至理則觸類皆迷故華嚴云心如工畫
師造種種五陰一切世間中無不從心造如心佛亦爾如佛
眾生然心佛及眾生是三無差別又起信論云所言法者謂
眾生心是心即攝一切世間出世間法依於此心顯示摩訶
衍義十六觀云諸佛如來是法界身入一切眾生心想中乃
至是心作佛是心是佛又般舟三昧經云佛是我心是我心
見佛是我心作佛等談斯旨者大乘卷中粲然可舉至若法

華妙部如來親記往生華嚴頓談普賢躬陳迴向是知彌陀因地觀此理而大誓普收釋迦果成稱此理而廣舌深讚十方三世莫不咸然問如上所明妙理圓極爲世人盡須觀行然始生耶答此不然也今但直決疑情令知淨土百寶莊嚴九品因果並在衆生介爾心中理性具足方得今日往生事用隨願自然是則旁羅十方不離當念往來法界正協唯心免信常流執此非彼其行願之相正在次門非此所問況九品生相各有行類上輩三品須解須行故文云汝行大乘解第十義即其人矣若今之學者見賢思齊企企金座而高升唯妙觀而是託若其中下之流亦品生因只是精持禁戒行世

仁慈乃至下下品生本是惡逆十念精誠便生彼國但能知有淨土盡可迴心苟不然者寧容九品之差降也

三疑自者問曰我是博地凡夫廿緣纏蓋云何此身生諸佛淨土入賢聖海同正定聚耶釋曰若了如上法性虛通及信彌陀本願攝受但勤功福寧候問津況十念者得生唯除五逆及謗正法又定心十念逆謗亦生今幸無此惡而正願至求天何感矣

義學編論席解紛

淨覺法師

仁岳

空名居士謂無已法師曰竊惟傳記所載始自晉時廬山遠公與諸信士結香火之社願生西方乃請社中劉遺民者爲

誓文或曰斯乃教門權漸之方便若究觀根極其惟息心達
本是正修行有唐雍州藍田釋法喜專修禪業預知將死本
衆忽聞林北有音樂之聲因以告喜喜曰世間果報久已捨
之如何更生樂處乃默而入定須臾樂聲便止喜亦端坐而
終又唐京師釋曇倫臨終有問往生何處答云無盡世界於
是寂然而化今詳二師善逝正是泥洹絕境夫何遺身之徒
求生淨土以彼較此一何鹿踈願叩兩端用袂未悟法師曰
余向者已聞揚公之書謂極樂爲示權誠乎忻厭取捨之說
不俟再問方欲連茹引而伸之今蒙致詰如弦得響豈得不
幾所言極樂爲權權必對實也請試陳之爲以小乘是權本

乘是實耶爲以有法是權無法是實即若謂小乘是權者
聲聞經中曾無一言勸讚往生十方淨土故迦葉云但念空
無相無作於菩薩法遊戲神通淨佛國土成就衆生心不喜
樂若謂有法是權者何但極樂是權至於泥洹皆是權耳故
須菩提云若有法勝於涅槃我說亦復如幻如夢由是言之
忻泥洹而厭極樂亦猶逃峯赴壑俱不免於害也又若謂吾
不取極樂亦不著泥洹曠然無朕不可擬議若爾則滅後無
生何殊外道斷滅之見復有說云吾滅度後十方世界皆是
我身何必定生西方極樂若爾則便同聖人普現色像儼未
證謂證大妄語罪其誰當之天台智者云常人明生即作生

解開無生即作無生解不知生即無生無生即生橫相是非
瞋他求生淨土幾許誤哉故知法喜不求於樂處量論示歸
於無盡斯乃遺情離著之語必非滅後永寂如空凡夫則循
業受生聖人亦隨機利見況法喜滅後降神於弟子曰吾欲
露屍山野給施衆生等豈非此身雖謝彼識猶生乎而指爲
泥洹絕境者將何以驗之且夫泥洹此翻滅度統指諸教其
唯二焉若聲聞泥洹者滅見思煩惱度分段生死證偏空之
理理既偏矣空不能有故身土皆亡此方便之說也若諸佛
泥洹滅無明煩惱度變易生死證中道之理理既中矣非空
非有故應化無窮此了義之談也今未審倫喜二師是何泥

洹若是偏空未免鹿跡若是中道何名絕境今之學人孰不
謂即心是佛觸目皆真寧勞乎轉物同如亦已乎超毗越釋
及無根其所角核其所歸空空然真若夜游實貪慧之具存
何忻厭而不超眷富貴如骨肉顧貧賤如瘡疣於吾善者願
欲外之太階於吾惡者恨不戮之都市凡此之類躬修淨土
謂之忻厭者不知其可也僧傳書禪篇中甚有苦節謹終之
者或西務安養或上訪知足慧真絕粒以行懺淨度然皆以
爲燈僧顯現感於彌陀智晞明見於堯率莫謂此等皆是習
俗鹿跡之人乎廬山遠公稀代之僧寶西域梵衆咸稱其地
有大衆道士每燒香禮拜輒東嚮稽首豈迷圓頓之教顯由

權漸之門劉雷之徒皆晉世髦傑何詭誕而隨之乎而不知漸門多昧於往來頭教盛稱於淨土佛言讀誦大東方等經典善能義趣於第一義心不驚動斯為上品往生之業又天親云二乘種人不生極樂華嚴有勸生之說法華有記往之文十方如來出長舌相靡不稱讚往生彼國彌勒問佛於此世界有幾菩薩生彼佛國佛言有六十七億不退菩薩一一菩薩已曾供養無數諸佛次如彌勒者也又佛言末世法滅之後特留無量壽經百年住世接引眾生以此證之如何芥子視往生之人如何慕塞極樂之路所損至大可不謹乎又後序云復有引傳燈大珠和尚云捨垢取淨是生死之業

龐居士云若捨煩惱入菩提不知何方有佛地以此句為淨土者固未可也且垢不淨之言即心即佛之義凡所釋教者孰不知之安以真如平等之談便廢因緣修證之法六住太士尚存分段之生四果真人亦有變易之死云何殞落永謂泥洹須知菩薩未證妙覺已還常以空心偏修萬行終日觀佛無佛可觀歷劫度生無生可度暫趣於空華淨土權依於幻化彌陀破昨夢之塵勞入乾城之地位乃至成佛雖自行冥寂而利他宛然故喻之以明鑑之身現之以隨類之像世人弗詢大義唯忻頓悟直入無生而不思永嘉一宿覺云若實無生無不生既豁達而取空恐蕩蕩而招禍此類

手越中翳射不踰數步之間龍西學游翻沒洄波之內如斯
知識未可參尋

淨土修因或對

檀菴法師

有嚴

或曰生欲天者十善爲因生色天者禪定爲因善禪不修而
生欲色天者未之有也夫生淨土者必須修無生妙觀
可得耳若妙觀無相應之期必淨土絕可生之理今之學者
都憊殷言謂生天難而淨土易輒以有相之善引脛而向望
風發願便待足蹈寶蓮身參聖衆謬矣若謂生天難是猶具
四足而走曠難若謂淨土易亦猶無兩翼而凌空易又孰信
對曰淨土非難易難易在人難者疑情咫尺萬里易者信

萬里咫尺所云修無生妙觀得生者誠哉是言也此雖正意
乃上根得生之一門耳然不可闢一門而塞多門安樂集云
生淨土者有二種一有相心謂著相忻樂二無相心謂理觀
相應若今之世甲下鈍根愚迷障重待理觀相應方生者或
少矣原夫佛慈接物方便多門有定散之善焉有佛法之力
焉有事福而假願力迴向焉有垂終劇怖而賴求救焉如是
等類百千萬數有藉其一必得往生是定善者修心妙觀首
楞嚴定等是也散善者如四十八願經修十念者都攝六根
但聲聲相續而已以未兼理定說名爲散是也佛力者如十
疑論云阿彌陀佛大悲願力攝取念佛衆生即能發菩提心

行念佛三昧等承佛願力即得往生如劣夫從轉輪王一日
一夜周行四天下非其自力輪王之力也法力者如佛菩薩
華明主菩薩令誦灌頂神呪加持沙土散亡者屍或亡者墓
彼所亡者或墮地獄餓鬼畜生中承是真言生極樂國是也
事福假迴向者慈心不殺具諸戒善受持祕呪讀誦大乘經
種福善迴向莊嚴成淨土因者如聲入角遠亦可聞得生極
樂是也垂終求救者臨命終時火車相現稱佛力故猛火化
為清涼風如僧雄俊臨入火鑊并汾州人屠牛為業臨終見
羣牛逼觸其身苦痛切已及張鍾馗救雞為業臨終見神人
驅羣雞啄破兩目流血盈床稱佛號時俱生淨土是也隨願

往生經云若人以亡者嚴身之具堂舍園林而施三寶其福
最多可拔地獄之殃往生淨土又無量壽經云諸小行菩薩
及修小功德者不可稱計皆得往生又梵網經令讀法師講
菩薩戒福資亡者得見諸佛等譬如國家搜揚草澤於文學
武學中取士者非一科況復此外更有奏陰若以奏陰喻佛
力學科喻行願彼則多士分職此則萬行成聖佛曰易往子
曰難生乍可順教談於易往開人解脫之門不須執迷說於
難生塞彼菩提之路孔子曰多聞闕疑謹言其餘則寡尤

淨土魔佛或對

同前

或曰多見世人發願願命終時待佛接引超生淨土若佛接引

豈不是魔乎謂世人發狂願耳

對曰魔非無也若謂發願求生淨土承佛接引必是魔者則佛誤人生魔宮矣普賢教人發願云願我臨欲命終時面見彼佛阿彌陀龍樹菩薩歷代聖賢咸有著述豈俱令人發狂願生魔宮耶子作此說斷佛種子非魔是何請爲子略陳魔相及降魔法夫魔有四種謂煩惱魔陰死及天魔若欲降之者如大集經云斷集諦是降煩惱魔知苦諦是降陰魔修道諦是降天魔證滅諦是降死魔又智論云得菩薩道故破煩惱魔得法性身破陰魔得法性又破死魔常一心破一切處心不著入不動三昧故破天魔然天魔最爲難識以能變現

爲佛菩薩像故又涅槃經云佛去世後後五百歲中魔道漸興魔作比丘壞亂佛法又禪門云魔鬼入心破正戒破正見破威儀破淨命不敬三寶父母師長或毀壞經書形像塔寺作諸罪逆斷滅善根現平等相毀他修善云非正道或說無因無果如是邪說壞亂正法具如九十六種外道經中一一分別惡魔之相又誰識之又智者禪門中教人辨魔有三法一者了知見聞覺知皆無所有不受不著亦不憂戚亦不分別若是魔者彼即自滅二者但反觀見聞覺知之心不見生處如是觀時魔便滅謝三者若作此觀不即去者但當正念勿生懼想正念不動知魔界如即佛界如一知無二如於魔

無所捨於佛無所取佛法現前魔自退去辨魔佛之真偽乃
學教有教眼者識之若悠悠之徒或命終之時風力解體精
神荒越怕怖章惶又何暇辨魔佛之真偽哉然火就燥水流
濕邪不干正或有一生之中以淳淨心堅固諦信至誠禮誦
悔過發願吾知此人若身若心則與彌陀氣類交接智論云
如風吹樹斜勢西傾及其倒時必當西倒習善得生亦復如
是脫更有久願力且薄罪障又重臨終相現稱佛垂救以佛
力故魔無能為若人合生安養淨土而為魔奪乃是佛之力
不如魔之力耶故大品般若云若人書寫般若波羅蜜經乃
至修行是佛力故魔不能為留難又諸大乘經中菩薩天仙

金剛力士各有誓願令修行人魔不得便故南云韋馱將
軍最多洪護若見魔屬惑亂比丘則懷惶奔赴應時剪除令
之生淨土人設為魔敵諸佛菩薩并護法神將豈不救邪原
夫命終見佛佛從心現淨土廣博現亦從心子迷指歸妄有
排毀吾恐有拔舌之痛伊匪堪也設或有人死生魔宮者以
修行時多雜魔業魔業者倚附佛法邀名射利外現清白內
唯腐臭詐偽欺罔吾我自高截他人千尺之長為半分揚自
已下句之少為萬斛此人氣分與魔交接命終之日儻不淪
三惡道則生魔宮向所謂水流濕亦可例也若免三惡得生
魔宮斯亦幸矣況太自在天本是大權故淨名經云作魔王

者皆是住不思議解脫菩薩以方便故教化眾生故經中魔王帶萬二千天女惑持世菩薩時維摩詰一為說法是諸魔女俱證無盡燈三昧向謂幸矣乃此是也奉願自後修行之徒但自內照修淨土心是淳淨心耶是魔業心耶萬法唯心心淨佛迎心垢魔接於理易了奚須致疑更有一類教眼盲者貪慢溢腹是非填膺平安之時四魔之中三不能識臨終之際恐魔宮口言降天魔而中心存坐脫之法願於豪貴家記生為人又一何可笑

唯心淨土說

圓辦法師

道琛

或問唯心淨土本性彌陀為當往生為即心是若往生者何

謂唯心若即心是何故經云過十萬億佛土耶或答事即一異約事須當往生據理即心而是今議曰圓家事理一體無殊何得抗分而通此義當知十界四土若淨若穢不離我心此心全是妄念以本具故具足百界千如依正等法此但直具而已若達全具為徧徧彼生佛彼彼生佛互徧亦爾趣本一法是法界之大都互具各具互融互攝然而不離亦不分一多自在不相留礙夫如是者豈有娑婆釋迦樂邦彌陀而離我心耶故輔行曰又復學者縱知內心具三千法義也而不知我心徧彼三千彼彼三千互徧亦爾互具義也一彼彼眾生彼彼皆具也苟順凡情生內外見今疑唯心淨土遠過十萬億諸利者正是生內外見也應

照理體本無四性心佛衆生三無差別能知此者依淨識心
準此則知三千本是融妙之法任運具攝依正色心淨穢國
土既曰三法無差則唯心本性無復致疑今更以譬喻顯之
如彼帝釋殿上千珠寶網衆珠之影映在一珠一珠是衆珠
彼彼千珠互映亦爾現前一心即是千珠中一彼彌陀佛土
亦是千珠中一所有十界衆生趣舉一界皆是千珠中一既
我一珠能映衆珠我心之內無復衆珠則離我心外無別淨
土何故爾耶以釋迦亦是一珠彌陀亦是一珠既舉一金收
豈心外有法故曰唯心淨土本性彌陀也然則唯心之言足
矣又何謂之過十萬億佛土耶當知經旨乃是以理揀情說

近何者情生則十萬迢遙唯心乃一念理是若爾唯心而已
何云淨土須知體非因果一念唯心迷悟既殊因果宛爾彌
陀果悟我等因迷忻厭心生順佛勸往故云唯心又攝淨土
矣然則既有取舍忻厭莫成虛偽耶曰當知圓人捨則捨穢
究盡三土九界皆捨取則取淨窮源直取上品寂光故妙宗
曰取舍若極與不取舍亦非異轍良由寂光不離三土十界
只是四土耳若以四眼二智觀之則萬像森羅三土九界須
捨若以佛眼種智觀之則真空眞寂非離三土九界別有寂
光非寂光外別有婆婆如古德曰只緣即心是佛須假修行
者乃此意也會得唯心則不妨十萬之程以理揀情其旨深

矣又復須知此約順謂了性為行以說若論逆則背性成迷
亦可談於唯心地獄以地獄亦是千珠中一亦是全具為徧
此地獄外無復餘法一切趣地獄是趣不過亦即三千俱皆
地獄如是則鐵床非苦變易非遷一切皆是性德本具性惡
法門由是而知若逆若順因果迷悟事理修性若了唯心本
性只一三千融妙之法十萬退方皆不為礙何以故以真具
故以三千故以融攝故得如斯以上略提梗槩若欲深證
此理須除情想

唯心淨土文

姑蘇禪師

守訥

禪師姑蘇鄭氏子其族顯官少依圓照禪師得大徹悟

道宣城縉素欽敬先自天衣懷禪師以下專用淨土法迺
相傳授皆遂往生各有明驗具載寶珠集師有淨心淨土
文今錄于此

佛說極樂淨土普勸娑婆羣生應當發願生彼國土然學頓
者拂之為權說不通理性者泥之於事相吾嘗學唯識唯遮
外境識表自心心外無境界全是心心法徧周淨土豈離乎
當念生佛同體彌陀全是於自心摠攝有情誠無凡聖之異
融通法界寧有遠近之區首楞嚴經心淨佛國聖境現唯
闡提無信根者則十萬億佛土遠隔一方之外矣天衣懷禪
師一生迴向淨土問學者曰若言捨穢取淨厭此忻彼則取

捨之情乃是衆生妄想若言無淨土則違佛語夫修淨土者當如何修復自答曰生則決定生去則實不去若明此旨則唯心淨土昭然無疑論云智習唯識通如是取淨土願諸同志決定求生政和三年癸巳比丘守訥叙

天親金剛般若論偈曰智習唯識通如是取淨土非形第一體非莊嚴莊嚴論自釋云智習唯識通者此明真土諸佛無有莊嚴國土之事諸佛唯有真實智慧智識通達則是修習無分別智通達唯識真實之性故如是取淨土者即修此智習唯識通菩薩之人乃取得淨土之果故非形第一體者此句明淨土體不自生滅爲淨土形乃以真實

第十一義理故淨土體故非莊嚴莊嚴者一形相土即水鳥樹林等事莊嚴也二法性土即是正智證契真如無漏功德無有形相爲莊嚴也

勸修西方說

解空法師

可觀

吾佛釋迦出現娑婆統化大千應迹中天八相成道垂慈爲物在諸大教或因之知華嚴法華或專爲一緣如十六觀無量壽經稱讚淨土經什譯即小本佛說阿彌陀經并鼓音王經偏讚西方勸修念佛一切大教正宗所詮修行門戶若欲依經所說行之自非本根本性宿世緣熟必難造詣速得發悟出離生死又恐生死何期不能善始今終是故阿彌

陀佛以本願力示現西方極樂世界依正莊嚴清淨蓮華三
輩九品爲欲攝受能念佛人一心不乱繫念彼佛時至緣會
恬然命終見佛光明不落魔境決定高超無際苦輪此一段
事若非釋迦出現世間何由得之固非小緣須知偏讚西方
乃急救法何翅中流失舟一壺千金正如佛說附彌陀經不
待時機發起即便爲說經意在此東晉廬山虎溪慧遠法師
結白蓮社賢士大夫并諸尊者一十八人同修西方念佛三
昧臨終見佛即得往生雖謝靈運以心難止之不許个杜自
此流通後世追仰遺風無間一切信向甚盛世傳六祖壇經
韶州人見六祖因問有修西方此法如何六祖答以自心有

西方即是真西方自有西方心何處覓西方東方人造罪作
業求生西方若西方人造罪作業求生何處但能悟性何所
不可噫如此鄙俚一笑可也竊名祖師不可行用或謂既云
悟性此亦有理其理偏尚無非禪病相傳高麗林焚毀此書遠
東人師稍有眼自昔高明教讚之何其失言此老戒根堅固
陳令舉爲作行狀平生童真其聲如擊清磬身後火浴六事
不壞可謂僧寶後世難及不可求備亦見此矣須知西方念
佛三昧甚易修行只在日用一心不乱繫念彼佛彼佛願力
自念佛力任運相應雖有取舍與不取舍殊無異轍何以故
念念離相了不可得如盤走珠自在無礙身心清淨猶如蓮

華達唯心了本性在我而已去此不遠

淨土略因

待制晁

說之

臨淄趙子和仁裕移書沛上老法華曰吾東州人近因予之
文始知有西方淨土可修而自天台教以出也予宜於此圖
妙大教專明茲真修一事益以惠我無情有性者僕謝之曰
具縛凡夫與予同在三災八難中何敢任此雖然病者未必
不識藥也竊聞之有生有死而凡聖殊有凡有聖而身土異
有身則有土有土則有身孰穢孰淨可不辨之耶我釋迦牟
尼佛與阿彌陀佛憫此眾生乃同一願力於無量無邊法門
之外建立此一法門釋迦賓之也彌陀主之也釋迦生之也

彌陀家之也釋迦於病藥之也彌陀使之終身不病也釋迦
之土猶逆旅也彌陀之土猶鄉閭也自西竺以望安樂國與
吾震旦之望安樂國一也是故文殊普賢彌勒龍樹賢護無
著天親皆願往生而觀音勢至在釋迦所亦在彌陀所吾土
始自慧遠白蓮社與謝靈運劉遺民輩倡導之後繼有曇鸞
道珍懷感懷王道綽善導之願行尤著而可考吾天台智者
大師承聖賢之後振法華之音其教始大備而行之益遠法
華之前有維摩經首以淨土起教法華之後有起信論終歸
證於淨土揆觀其目蓋有十種佛土二十七品佛土其合之
為四土則復自吾智者始是四土之名散在法華華嚴維摩

仁王普賢行願及大智度論唯吾智者合而次第之其在維摩之空室法華之空中寶蓋則常寂光土也維摩之衆生寶蓮華法華之衆皆是菩薩則寶報莊嚴土也維摩法華之聲聞菩薩共爲僧等則方便有餘土也維摩之見妙喜國法華之三變大地則同居淨土也維摩有香積菩薩法華初放太光明則同居穢土也佛告寶積長者子言菩薩隨所化衆生而取佛土則同居土也隨所調伏衆生而取佛土則方便有餘土也隨諸衆生應以何國入佛智慧而取佛土則寶報莊嚴土也隨諸衆生應以何國起菩薩根而取佛土則常寂光土也其文雖隱而其義彰其名雖散而其理合苟非吾智者出

之則如之何嗟夫遠公於教典未備之時根機未熟之際率羣賢而創導之智者斂波瀾而淵澄開隱秘而震耀終成此教以貽來者顧豈不求自淨土而欲斯穢土淨耶然法華於藥王品示安樂世界生蓮華中其在普賢品則示兜率天生彌勒所吾智者捨普賢之行而專意藥王之證其後有慈惠法師復捨乎藥王而專意普賢則又深知四土之分別者也明知四土則十有六觀盡矣三身三觀四教萬法悉無遺矣雖然有二患焉一曰疑而不信彼疑不自信則我內信而何補智者猶病諸十疑論所以作也唐永州梁上人特書是論於龍興寺壁其所感深也二曰信而狂且愚不知悟心以入

觀明因以克果但言我能心淨孰非淨土似能為維摩之言
而身實天魔之民也豈不重可惜哉其在今世洪此教也蓋
有人焉如慈雲法師之教行四明法師之觀智近者靈芝律
師之辯論何以尚之海上老法華初從明智法師而生信後
頗從容於靈芝云待制道安老法華亦曰天台
般僧後見靈芝於吾道矣

淨土餘說

草庵法師

道因

經有云彌陀是法界身者有六十萬億那由他由旬身者有
又六者有八尺者有城廣十千由旬者有浴池廣八萬四千
里者有疑城者有邊地者有胎宮者有飲食者有華葉二百
五十由旬者有大如車輪者有父母者有魔王者有不嚴上

如釋迦者然諸經論往往更有不同者豈一時起機之權耶
曰安可謂之權乎且吾釋迦王三千大千世界則此一四天
下果報尚且有殊豈諸國皆同乎應身同居其猶若是也矧
三身四土乎況彌陀攝受十方念佛衆生高下淺深抑亦不
等恐下帶大千界而已豈止十千由旬之局哉又況三身四
土乎由是而知不同之說為若此也然諸經論不明言之者
既欲使行者專注一境所以不必多及之也矧如向所叙者
即多及之相乎然此唯四明深達之常解五濁輕重同居淨
穢曰此淨其通須知別意如四教初心及戒善者皆能五濁
輕薄感同居淨今圓觀輕濁依正最淨此於餘經修衆善行

其相天殊他聞此說以謂四明是何義歟夫金翅獸龍於九淵貫于七金棲息於鐵圍之上并蛙信之乎

淨土自信錄記

無功叟王

闌

余觀如來東流之教若直指本心令人究理之說有識者既已信之矣而庸鄙之徒亦無敢議者及乎示淨土論往生則人莫不懷疑焉且眾生本心具四淨土曰凡聖同居曰方便有餘曰實報無障礙曰常寂光如凡聖同居者在具縛凡夫即可依之其餘三土至斷惑聖人始獲證入焉往生下門有二淨業曰正觀默照本心也曰助行備修萬行善也正觀與助行並進則達四淨土止有願等事善者近生凡聖同居而

遠作上三土之因也以此論之則淨土者正是究理菩薩所登境界而兼容悠悠眾生迴向漸修耳彼信如來直指本心令人究理之說而疑其示淨土論往生者何哉大抵眾生本心體無一法有形用無一相不備彼不知之謂直若太虛寥曠無復依正莊嚴又助行以正觀為主正觀以助行為輔二者相待而立似反而符彼不知之謂究理忘緣則何須加願加願往生則有妨究理況復淨土具有四品其往生者上至究理菩薩下及漸修眾生則何類不收何機不攝彼不知之聞聖師高僧往生則自甘絕分見婦人童子念佛則恥從其事噫如來之稱讚淨土也其意若曰淨土自他凡聖因果即

衆生之自心耳。往生淨土易。自信自心難。當時十方諸佛知其說一切世間難信之法。由是舒舌勸信。既而如來又喻之。使信受焉。則太覺垂慈之旨於斯可見。而衆生終不信。是可歎也。一日客有訪余以淨土教者。嘗隨其所語而論說之矣。暇時編次成書。得十問答。名曰淨土自信錄。或見或聞。或依或違。不動娑婆。即歸極樂。此余之志也。四明無功叟王闓記。

淨業專雜二修

京師比丘 善導

問曰。何故不令作觀。直遣專稱名號者。有何意耶。答。衆生障重。境細心麤。識颺神飛。觀難成。就是以大聖悲憐。直勸專稱名字。正由稱名易故。相續即生。若能如上念念相續。畢命爲

期者。十即十生。百即百生。何以故。無外雜緣得正念故。與本願相應。故不違教。故順佛語。故若捨專念修雜業者。百中希得一二。千中希得三四。何以故。乃由雜緣亂動。失正念故。與佛本願不相應。故與教相違。故不順佛語。故繫念不相續。故心不相續。念報佛恩。故雖作業行。常與名利相應。故樂近雜緣。自障障他。往生正行。故比見諸方道俗解行不同。專雜有異。但使專意作者。十即十生。修雜不至心者。千中無一。仰願一切往生人等。善自思量。已能全身願生彼國者。行住坐卧。心須勵心克己。晝夜莫廢。畢命爲期。上在一形。似如少苦。前念命終。後念即生長時。永劫常受無爲法樂。乃至成佛不

退生死豈不快哉

辨橫豎二出

桐江法師 擇瑛

豎出者聲聞修四諦緣覺修十二因緣菩薩修六度萬行此涉地位譬如及第須自有才學又如歷任轉官須有功效橫出者念佛求生淨土譬如蔭叙功由祖父他力不問學業有無又如覃恩普轉功由國王不論歷任淺深於橫出中有定散二善故吾導和尚立專雜二修雜修者謂散漫修諸善業迴向莊嚴也專修者身須專禮阿彌陀佛不雜餘禮口須專稱阿彌陀佛不稱餘號不誦餘經呪意須專想阿彌陀佛不餘觀若專修者十即十生百即百生若雜修者百中或得一兩人生千中或得三五行人生今見世人有二日禮阿彌陀佛三千拜者日稱阿彌陀佛十萬聲者有晝夜習生專想阿彌陀佛者並有感應斯可驗也

晨朝十念法

天竺懺生 遵成

修淨業者須每日清晨服訖已後面西正立合掌連聲稱阿彌陀佛盡氣為一念如是十氣名為十念但隨氣長短不限佛數惟長惟久氣極為度其佛聲不高不低不緩不急調停得中如此十氣連屬不斷意在令心不散專精為功故名此為十念者顯是藉氣定心也盡此一生不得一日暫廢唯將不廢自要其心必生彼國作此念已發願迴向云

我弟子某甲一心歸命極樂世界阿彌陀佛願以淨光照我
慈誓攝我我今正念稱如來名經十念願為菩提道求生淨
土佛昔本誓若有眾生欲生我國至心信樂乃至十念若不
生者不取正覺唯除五逆誹謗正法我今自憶此生已來不
造逆罪不謗大乘願此十念得入如來大誓海中承佛慈力
眾罪消滅淨因增長若臨欲命終自知時至身不病苦心無
貪戀心不倒散如入禪定佛及聖眾手持金臺來迎接我如
一念頃生極樂國華開見佛即開佛乘頓開佛慧廣度眾生
滿菩提願

念佛方法

周前

夫大覺世尊以四種法度諸眾生一者示現相好令觀察者
發菩提心二者示現說法令得聞者開悟入道三者示現化
事令見聞者獲諸法利四者名號流布十方令其聞者執持
繫念罪滅善生而得度脫今言念佛者或專緣一十二相繫
心得定開目閉目常得見佛或但稱名號執持不散亦於現
身而得見佛此間現見多是稱佛名號為上如懷感法師一
向稱阿彌陀佛名號而得三昧現前見佛故今普示稱佛之
法必須制心不令散亂念念相續繫緣名號口中聲聲喚阿
彌陀佛以心緣歷字字分明使心口相繫若百聲若干聲若
萬聲若一日若二日若七日等但是稱佛名時無管多少並

須一心一意心口相續如此方得一念滅八十億劫生死之罪若不然者滅罪良難若恐心散須高聲疾喚心則易定三昧易成故感法師決疑論中引大集白藏經云小念見小佛太念見大佛論釋曰太念者大聲稱佛也小念者小聲稱佛也斯則聖教有何惑哉奉勸今諸學人唯須厲聲念佛三昧易成小聲稱佛遂多馳散此乃學者方知非外人能曉也此又與天台智者大師釋觀經中罪人臨終十念稱佛滅地獄火得生淨土其意宛同如云是心雖少時而力猛利諦心決斷勝百年願力是心名為大心不惜身命名為健人也彼云太念此云太心彼云厲聲此云猛利不惜身命彼云小聲多

散此云勝百年願力豈非皆今猛利大聲稱佛雖少而功多若小聲稱佛雖多而功少故云十念能勝百年今時多見世人稱佛都不精專散心緩聲遂致現世成功者少臨終感應事稀故今特示此法切勸凡念佛時一心不乱高聲唱佛聲聲相續不久成功也

按量念佛功德

同前

般涅槃經云假使一月常以衣食供養一切衆生不如有一念念佛所得功德十六分之一假使鍛金為人車馬運乃至衆寶各滿百數以用布施不如發心向佛舉足一步假使有人以大象車盡載大秦國中種種珍寶及以瓔珞數

各滿百以用布施猶亦不如發心向佛舉足一步若以四事
供養三千大千世界所有衆生猶亦不如發心向佛舉足一
步所得功德無量無邊經已上普勸在家信心士女每日晨朝
著衣淨心瞻禮佛像如見真佛無異莫令一日空過設使公
私忙急亦須標心略入佛堂燒香頂戴所貴舉一步向佛若
有閑暇朝暮莫捨不拘早晚請觀一念念佛及舉足向佛一
步功德如此殊勝何況步步念念旋繞念佛所滅罪障所得
功德不可思議

往生坐禪觀法

同前

欲修往生觀者當於一處繩床西向易觀想故表正而故加

跏趺坐項脊相對不昂不偃調和氣息定住其心然祇修觀
門經論甚多初心凡夫那曾徧習今從要易想略示一種於
二種中仍逐所宜未必併用其有於餘觀想熟者任便但得
不離淨土法門皆應修習所言二種一者扶普觀意坐已自
想即時所修計功令生極樂世界當便起心生於彼想於蓮
華中結加跏趺坐作蓮華合想作華開想當華開時有五百色
光來照身想作眼目開想見佛菩薩及國土想即於前坐
聽妙法及聞一切音聲皆說所樂聞法所聞要與十二部經
合作此想時大須堅固令心不散心想明了如眼所見經久
乃起二者直想阿彌陀佛丈六金軀坐於華上專繫眉間白

毫一相其毫長一丈五尺周圍五寸外有八楞其毫中空右
旋宛轉在眼中間瑩淨明徹不可具說顯映金顏分齊分明
作此想時停心注想堅固勿移然後應觀想念所見若成未
成皆想念因緣無實性相所有皆空一如鏡中面像如水現
月影如夢如幻雖空而亦可見二皆心性所現所有者即是
自心心不自知心心不自見心心有想即癡無想即泥洹心
有心無皆名有想盡名為癡不見法性三因緣生法即空假
中不一不異非縱非橫不可思議心想寂靜則能成就念佛
三昧久而乃起

念佛修心術

中堂法師

序論

諸大乘經勸生淨土因通三種一定二散定謂即心觀佛想
彼西方依正主伴唯心本具我心空故如來本空我心假故
如來宛爾我心中故如來絕待或想蓮華開合我居其中合
表即空開表即假四微體同即表中道故經云諸佛如來是
法界身入一切衆生心想中是故我等心想佛時是心即是
三十二相八十種形好是心作佛是心是佛此乃如來親示
唯心三昧圓常觀體了彼淨土生佛依正色心悉我自心性
具功德即境為觀心外無佛性外無主觀之不已證無生忍
二者散善用純實心信有西方一心不乱繫念彌陀一日七
日聲聲不絕念念無閒經云執持名號一日七日一心不乱

其人命終阿彌陀佛與諸聖衆現在其前然事想彼國但無
三觀名散善耳故三種淨業迴向願生咸登極樂吾祖智者
云根有利鈍行有定散觀佛三昧名定修餘善業說以為散
散善力微不能滅除五逆此經明觀故得往生是知若定若
散或鈍或利皆淨土因咸趣無生永無退轉矣

寶王論揀示往生義

草堂禪師

飛錫

問學佛道者心散難檢今欲一以貫之專西方念一佛踐不
退地袪有漏心乘扁舟於黃金之池禮彌陀於白玉之殿以
通三世希沾九品不亦可乎對曰龍樹十住婆沙論云菩薩
道有難行行如陸地乘舟也有易行行如水路乘舟也阿彌

陀佛本願之力若人聞名稱念自歸彼國如舟得水又遇便
風一舉千里不亦易哉則釋迦如來父王眷屬六萬釋種皆
生極樂土蓋佛與此界衆生緣深故專注一境不亦良哉
問世之人多以寶王水精金剛菩提本標為數珠矣吾則以
出人息為念珠焉稱佛名號隨之於息有大特怙安懼一息
不還屬後世者哉余行住坐卧常用此珠縱令昏寐念佛而
寢覺即續之必於夢中得見彼佛如鑽燧烟飛火之前拍夢
之不已三昧成焉面觀玉毫親蒙授記則萬無一失也

問一念十念往生淨土何者為正對曰但一念往生住不退
地此為正也如佛所說謗佛毀經打僧罵尊五逆四重皆下

念惡業成墮無間獄猶如箭射今之念佛生于淨土亦一念
善業成即登極樂猶如屈臂前一念五陰滅後一念五陰生
如蠟印印泥印壞文成尚不須兩念豈要至十念哉又一念
者如經云愛酪沙彌生一念愛心後生酪中作蟲斯皆一念
非十念也又大無量壽經明一念念佛皆得往生觀經十念
良有以也蓋為蓮疾疴羸力微心劣故須十稱彌陀以助其
念若心盛不昧一念生焉亦猶栽植絲髮其茂百圍也
問方等經中修無上深妙禪定今結想白毫兼稱佛號以祈
勝定既契之後心佛兩忘信有之矣但默念泉澄即三昧自
至亦何必聲喧里巷響震山林然後為道哉對曰誠如所問

聲亦無契試為明之何者夫辟散之要要存於聲聲之不屬
心竊竊然飄飄然無定聲之屬也拔茅連茹乘策其後畢命
一對長謝百憂其義一也近而取之聲光所及萬禍冰消功
德叢林千山松茂其義二也遠而說之金容煒煌以散彩寶
華浙瀝而雨空若拍諸掌皆聲致焉其義三也如牽木石重
而不前洪音發號飄然輕舉其義四也與魔軍相戰殲敵相
望用聲律於戎軒以定破於強敵其義五也具斯衆義復何
厭哉未若喧靜兩全止觀雙運叶夫佛意不亦可乎定慧若
均則兼忘心佛誠如所問矣故廬山遠公念佛三昧序云功
高易進念佛為先察夫玄音之扣心聽則塵累每消滯情融

朗非天下之至妙其孰能與於此歟言明證者未若華嚴經
偈云寧受無量苦得聞佛音聲不受一切樂而不聞佛名然
則佛聲遠震開善萌牙猶春雷之動百草安得輕誣哉

念佛方便文

司諫江

公望

公嚴州人智識高明少年登第崇寧初直言極諫名著當時
酷好宗門參善知識蔬食葛衣砥節礪行晚年專修淨
業悟入念佛三昧有念佛方便文刻石流布指導羣生宣
和未知廣濟軍一日不疾加跌而化知其為淨土之歸矣
其文曰

世出世間之法欲得成辦省力莫若繫心一緣祇如誦念阿

彌陀佛名號念若出聲不唯曰妄耗之賊氣齒舌數計諸心心
隨動耳根承攬分別識生聞性內搖隨出不反是二成
久或怠若祇心念不作音聲心機潛伏未得慧照安事友聞
外機不抽內對不出沉濁昏住易成廢忘有巧方便無用動
口不出音聲微以舌根敲擊前齒心念隨應隨心應量循業
護現舌意根下念念之中便有阿彌陀佛四字音聲歷歷可
陳聲不越竅聞性內融心應舌機機抽念根心數在舌敲擊
竅聞機機念復寄竅在耳從聞入流聞皮精元寂聞聞性足
三融會念念圓通肉團心現本性彌陀五濁身遊唯心淨刹
久久遂成唯心識觀若是利根之人念念不生心心無所六

根本寂諸識消落法法全真門門絕待瞥爾遂成真如實觀
初機後學唯除賓客寒溫時大小便利時可暫停念如或未
免葷茹睡卧未至昏瞶乃至營辦家事種種作務口不用捨
亦自不相妨礙心口念念聲聲稱誦勝號更有甚邪思惡慮
敢萌於心自然純一無雜若能都攝六根淨念相繼不過旬
月便成三昧所謂是心作佛是心見佛是心是佛上根大器
一念直超平展之流善觀方便釣臺江公望述
念佛方法當如慈雲懺主及寶王論所示江公著述亦可
別收一機蓋悉檀徧被無不可者

無常院安彌陀佛像

出無盡燈

華嚴賢首品曰又放光明名見佛此光覺悟將歿者令隨憶
念見如來命終得生其淨國見有臨終勸念佛又示尊像令
瞻敬俾於佛所深歸仰是故得成此光明今見佛者一捨命
不恐二惡道不畏又要臨終勸者智論二十八云臨終少時
能勝終身修行之力以猛利故如火如毒依西域法秣園西
北角日光沒處為無常院若有病者安置在中以凡生貪染
見本房內衣鉢眾具多生戀著無心厭背故制令至別處堂
號無常去者極多還反一二即事而求專心念法其堂置一
尊像金箔塗之面向西方其像右手舉左手中繫一五彩幡
脚垂地當安病者在像之後左手執幡脚作從佛往生之

意贖病者燒香散華鳴磬助稱佛名莊嚴病者乃主若有屎
尿吐唾隨有除之亦無有罪況佛無愛憎但有歸投者無不
拔濟更爲病者隨機說法命終恒在佛所不得移之若神將
天方去留無礙者置之言外不爾勉旃斯行

臨終正念訣

京師比丘

善導

知歸子致問於淨業和尚曰世之大者莫越生死一息不來
乃屬後世一念若錯便墮輪迴小子累蒙開誨念佛往生之
決其理雖明又恐病來死至之時心識散亂仍慮家人感動
正念忘失淨因伏望重示歸還之方俾脫沉輪之苦師曰前
哉斯問之要也凡入臨命終時欲得往生淨土者須先準備

不得怕死貪生常自思念我現在之身多有衆苦不淨惡業
種種交纏若得捨此穢身即得往生淨土受無量快樂見佛
聞法離苦解脫乃是稱意之事如脫臭弊之衣得著珍御之
服放下身心莫生貪著纔有病患莫論輕重便念無常一念
待死須囑家人看病人往來揖問人凡來我前但爲我念佛
不得說眼前雜閑之事家緣長短之事亦不煩輒語安慰只
願安樂之詞此皆是虛華不實殃及之語及至病重命將不
可之時家人親屬不得來前垂淚哭泣發嘆懊惱之聲惑
亂心神失其正念但教記取阿彌陀佛一時高聲爲我念佛
守念氣絕待氣盡了方可哀哭更或有明解淨土之人頻來

策勸其理最佳若如此者于萬往生必無疑慮也此是端的
要急之旨當信而行問求醫服藥應不用耶答此但論用心
矣其藥醫療不妨自求然藥只能醫病豈能醫命耶命若盡
藥豈奈何問神祇禍福求禱如何答人命長短生下已定何
假鬼神延之耶世人迷惑反更求邪殺害衆生祭祀神鬼但
增罪業倍結冤讎反損壽矣大命若盡小鬼奈何空自惶惶
必無所濟切須謹之當以此文帖安堂前喫食之處及來往
要路之間令時時見之常記於心免見臨危忘失問平生不
曾念佛者還用得否答此法僧人俗人不念佛人用之皆得
往生決無疑矣余多見世人於平常時念佛禮拜幾願往生

及到病患臨終但只怕死都不見言此事直待形消氣
投冥界方始十念譬如賊去關門濟何事耶而況死門動大
頭自著便宜一念蹉跎歷劫受苦誰人相代思之思之

命終請僧念佛感應

出寶珠集

集傳姑蘇法雲
禪主息庵集

近時姑蘇長老悟公退居陽山併絕世緣日常念佛嘉其事
志信問何緣致此篤信悟忻然云頃萬壽遇集維那厥疾
不瘳餘資二次請衆念佛命終後居衆寮中譏其傲慢入堂
將卧聞梁上云集生淨土驚駭佇思疑無淨業奚得往生斯
須復云臨終兩次衆念佛故嗟嘆良久自此投誠余聞悟說
已因思道氣法師對唐明皇云佛力法力二賢十聖亦不能

測則知塵世人難以識情圖度但當仰信而行斯可矣
還丹一粒點鐵成金真理一言革凡成聖彌陀教觀真點
鐵成金之妙藥也彼佛自塵點劫來修行成身成國發四
十八願終能克果威德光明不可思議觀經一聞佛名號
除八十億劫生死之罪至於五逆十惡者臨命終時遇善
知識教誨稱十念即得往生是知諸眾念佛更有此顯應奈
何世人不知念佛是點鐵成金之藥而求往生雖知者亦
不能起大深信因循怠忽甘心五濁流轉生死枉受諸苦
實可憐憫人之安健之時能請眾念佛懺罪解冤為往生
決定之法況當疾革之際恐怖生死之時而能勇猛發心

請久修淨業人大作佛事以助西往實為要門觀集維那
臨終念佛事誠為世人之龜鑑云爾

个觀睡時發願見佛

出大藏集諸
經禮懺儀

修淨業者凡入觀與睡時應先起立合掌一心向西手稱阿
彌陀佛觀音勢至清淨海眾竟次對佛發願曰弟子現是生
死凡夫罪障深重輪迴六道苦不可言今遇善知識得聞彌
陀本願名號一心稱念求願往生願佛哀憫垂手接引弟子
不識彌陀世尊身相光明願佛菩薩示現身相及彼世界莊
嚴等事說此語已一心正念即便入觀及睡或有於正發願
時見諸瑞相或於觀中得見或於睡夢得見此願以來大有

現驗不能具述惟勸意行之者方信不虛

慶懺禮佛會疏

草菴法師

道因

右伏以彌陀依眾生心而發現眾生依彌陀智願而出纏應
外無機即眾生心中之諸佛機外無應乃諸佛心中之眾生
生佛一如感應同致百非皆遣四運俱推如是則念念不生
疑聲聲皆解脫欣逢妙事願結勝因哀聚資糧廣邀緇素本
衆之道心俱發十年之勝集偶圓內外欣懽恭伸慶懺伏惟
彌陀慈父釋迦導師一折下攝而共熟機緣無黨無偏而同
成勝業所冀遠近情盡淨穢見忘不待彌勒之下生速證寂
光之上品鐵鈎鈎象盡陪蓮社之游蠟印印泥即預華池之上

投身殞命刻骨銘肌上扣洪慈仰惟昭鑒謹疏

樂邦文類卷第四

東晉書卷之四

